

竹齋詩餘一卷

黃機

竹齋詩餘

目錄

- | | | |
|--------|--------|---------|
| 沁園春八調 | 八聲甘州一調 | 乳燕飛三調 |
| 摸魚兒一調 | 水龍吟一調 | 喜遷鶯一調 |
| 木蘭花慢四調 | 滿江紅三調 | 醉江月二調 |
| 水調歌頭二調 | 六州歌頭二調 | 永遇樂一調 |
| 傳言玉女一調 | 清平樂六調 | 眼兒媚三調 |
| 謁金門五調 | 霜天曉角四調 | 夜行船一調 |
| 長相思一調 | 烏夜啼一調 | 祝英臺近一調 |
| 鵲橋仙四調 | 西江月二調 | 憶秦娥一調 |
| 定風波一調 | 虞美人三調 | 踏莎行一調 |
| 蝶戀花一調 | 好事近一調 | 小重山一調 |
| 醜奴兒二調 | 更漏子一調 | 減字木蘭花二調 |
| 臨江仙三調 | 南鄉子一調 | 鷓鴣天三調 |
| 菩薩蠻三調 | 浣溪沙四調 | 山花子二調 |
| 卜算子一調 | 醉蓬萊一調 | 醉落魄一調 |
| 江城子一調 | 訴衷情一調 | 朝中措二調 |

宋六十名家詞

柳梢青一調

滿庭芳一調

二

竹齋詩餘目錄終

竹齋詩餘

宋 黃 機

沁園春（奉柬章史君再遊西園）

問訊西園。一春幾何。君今再遊。記流觴亭北。偷拈酒戲。凌雲臺上。暗度詩闌。略略花痕。差差柳意。十日不來紅綠稠。須重醉。便功名了後。白髮爭休。定誰騎鶴揚州。任書放牀頭。酸瓠頭。況殷勤鶯燕。能歌更舞。輕狂蜂蝶。欲去還留。歲月易忘。姓名須載。筆勢翩翩回萬牛。歸來晚。有燭明金翦。香暖珠簾。

又（壽）

六月云初。人爭議公。公無阻傷。記傳飛急羽。舟泛海道。瀾漫白水。路入沙場。萬姓三軍。倚公爲命。法有逗遛。公自當。君還信似。崔嵬砥柱。屹立瞿塘。此行陰德難量。到論定。纔知滋味長。看魚肥蟹健。妻孥共樂。酒煠稻熟。翁媪相將。何以報公。祝公千歲。多少人家。燒夜香。凌煙上。更聲名凜凜。冠劍堂堂。

又（壽）

問訊梅梢。小春近也。花應漸開。記華堂此日。紅牙絲竹。歡聲昨夜。翠玉尊罍。霧節童童。金旂曳曳。人自閨風。玄圃來。嬉遊處。任滄波變陸。劫火成灰。行天看取龍媒。笑衛霍當年如此哉。有

筆頭文字。何妨揮灑。胸中兵甲。解洗氛埃。見說君王。防秋才子。便著芝泥封詔催。功名事。付孱顏燕石。突兀雲臺。

又（次岳總幹韻）

日過西窗。客枕夢回。庭空放衙。記海棠洞裏。泥金寶屐。醅醱架下。油壁鈿車。醉墨題詩。薔薇露重。滿壁飛雅行。整斜爭知道。向如今。漂泊望斷天涯。小桃一半蒸霞。更兩岸垂楊。渾未花。便解貂貫酒。消磨春恨。星珠買笑。酬答年華。對面青山。招之不至。說與浮雲休苦遮。山深處。見炊煙又起。知有人家。

又（廖總幹席上）

暑風清微。梅腮漸紅。麥鬚未黃。恨牡丹多病。醫治費巧。醅醱易老。點綴無方。客裏光陰。愁中意緒。想美人兮。山水長銷凝處。有龍絲墜簡。來喚持觴。華堂賸貯春光。粲一行珠璣。時樣妝。更燕留輕態。詞翻古調。鶯嬌欲嘯。曲度新腔。玉漏聲沈。銀潢影瀉。滯酒猶燒心字香。歸來也。判明虬永日。瑞錦鴛鴦。

又（爲潘彬州壽）

問訊仙翁。因勤爲底。來萬山中。想橘邊丹井。鶴尋舊約。松間碧洞。鹿養新茸。霧節亭亭。星旂曳曳。導以浮丘。雙玉童嬉遊處。盡祥煙瑞雨。霽月光風。歡聲已與天通。更日夜彬江。流向東。定

催歸有謂。泥香芝檢。留行無計。路熟花驄。入侍嚴凝。密陪清燕。吳水歡然相會。逢年年裏。對春如酒好。酒似春濃。

又（送徐孟堅秩滿還朝）

人物眇然。落落曉星。如君幾何。有飄搖長袖。工持月斧。寂寥遺韻。妙鼓雲和。政事文章。特其餘事。英氣橫空。時浩歌。還堪笑。似龍文古鼎。誰復摩挲。青絲繫馬庭柯。爲小駐壽君金叵羅。說一時偉望。齊高岳麓。二年遺愛。拍滿湘波。世事多端。細憑商略。痛處不須言語多。從今去。好經從烏府。躡上鑾坡。

又（送趙運使之江西）

有美一人。昔在何居。今方見之。儼瓊纓翠弁。氣清芬只。珠幢絳節。光陸離兮。吾道非耶。世情復參。天驥昂藏。不受羈。還知否。定曲高寡和。才大難施。行吟湘水之湄。看雲卷雲舒。無定姿。想粲然長笑。物皆有用。時哉易失。我亦奚爲。袖手旁觀。何如小試。欲脫囊中失利錐。君休歎。正梅花將發。塵滿征衣。

八聲甘州（爲遜齋壽）

問仙翁底事。到人間。人間足嬉遊。向文邊書意。詩邊著語。□滿南州。逸韻高情。總似野水蕩孤舟。所未能忘者。藥鼎茶甌。政恐功名相混。便扶搖直上。龍尾螭頭。想塵緣終薄。歸去老菟裘。

有當年東鄰西舍。辦雞豚相與燕春秋。階庭裏。兒孫袞袞。飛度驂騑。

乳燕飛（次岳總幹韻）

擊碎珊瑚樹。爲留春。怕春欲去。駛如風雨。春不留兮。君休問。付與流鶯自語。但莫賦。綠波南浦。世上功名。花梢露。政何如。一笑翻金縷。繫白日。莫教暮。蒼頭引馬。城西路。趁池亭。荻芽尙短。梅心未苦。小雨欲晴。晴不定。漠漠雲飛輕絮。算行樂。春來幾度。鞭影不搖。鞍小據。過橫塘。試把前山數。雙白鷺。忽飛去。

又（次徐斯遠韻寄稼軒）

興潑元同宇。喚君來。浮君大白。爲君起舞。滿斑斑。功名洒淚。百歲風吹急雨。愁與恨。憑誰分付。醉裏狂歌。空漫觸。且休歌。只倩琵琶訴。人不語。絃自語。詩成更將君自賦。渺樓頭。煙迷碧草。雲連芳樹。草樹那能知人意。帳望關河。夢阻。有心事。牋天天許。繡帽輕裘。眞男子。政何須。紙上分今古。未辦得。賦歸去。

又

秋意今如許。怪征鞍底事。匆匆。翩然難駐。斗帳屏圍。山六曲。怕見瑣窗欲暮。請誰伴。梧桐疎雨。路入衡陽天一角。更山環水繞。無重數。客易。便難阻。相思纔信。相思苦。省疎狂。迷歌殢酒。把人輕誤。問取歸期何日是。指點庭前。幽樹定冷藥。疎花將吐。此去西風吹雁過。家身心別後。

安平否。聊慰我。至誠處。

摸魚兒

惜春歸。送春惟有亂紅撲。斂如雨。亂紅也。怨春狼藉。搵得淚痕無數。腸斷處。更喚起。瓊鵲催發。長亭路。征鞍難駐。但脈脈。含顰人底事。剛愛逐春去。闌干憑芳草。斜陽凝竚。愁連滿眼煙。樹鬢鬆。不理金釵溜。鸞鏡一奩香霧。花誰主。恨玉容寂寞。□□春知否。單衣嬾卸。任門外東風。流鶯聲裏。盡日攪飛絮。

水龍吟

晴江滾滾東流。爲誰流得新愁去。新愁都在長亭望際。扁舟行處。歌罷翻香。夢回呵酒。別來無據。恨荼蘼吹盡。櫻桃過了。便只恁。成孤負。須信情鍾易感。數良辰。佳期應誤。才高自嘆。綵雲空詠。凌波漫賦。團扇塵生。吟牋淚漬。一觴慵舉。但丁寧。雙燕明年。還解寄平安否。

喜遷鶯（香風亭上）

平湖百畝。種滿湖蓮。葉繞隄楊柳。冉冉波光。輝輝煙影。空翠濕襟袖。靜愜鄰雞啼午。暖逼沙鷗眠晝。西園路。更紅塵不斷。蝶酣蜂瘦。知否。堪畫處。野蕘蕪菁。胷地鋪茵。繡桃李陰邊。桑麻叢裏。斜蘸酒帘。誇酒竹寺。小依山趾。茅店平窺津口。春又晚。正香風有客。倚闌搔首。

木蘭花慢（次岳總幹韻）

歎鏡中白髮。元不向酒邊栽。奈詩習未除。客愁易感。賸要安排。浮名任他有命。怕青山頗怪。不歸來。出屋長松。招鶴繞渠流水行杯。浪驅羸馬踏江淮。幽夢苦相催。甚狹路嶽崎。雄心突兀。誰忍徘徊。此事正煩公等。笑曹劉只合作興臺。我自人間屈曲。青雲有眼休回。

又(壽)

政胡塵滿野。問誰與作堅城。有老子行年。平頭六十。無限聲名。向來試陳大略。便羣兒啁哳耳邊鳴。爭識規模先定。破羌終屬營平。吾心惟有忠誠。羞媚嫵。做逢迎。謂干戈鋒鏑。動關民命。此不宜輕聽。渠自分勇怯。奈何他天理。若持衡。只把從前不殺也。應換得長生。

又(次岳總幹韻)

問功名何處。算只合付悠悠。怕僮僕揶揄。長年爲客。楚尾吳頭。春來故園漸好。似不應不醉把春休。賸買萸蒿荻筍。河豚已上漁舟。人間大半只閒愁。衰笠夢汀洲。向桃花花邊。招邀同社。秉燭來遊。連臺聽渠拗倒。更麴生元不厭誅求。世事翻雲覆雨。滿懷何止離憂。

又

賈文王前子。自不與世人同。況地望旣華。天資更偉。雲驥行空。年少才名蜚動。泛星槎。曾到廣寒宮。桂子香濃。秋月桃花浪暖。春風。神仙之說。朦朧鉛汞。亦何功。政磐石規模。維城事業。倚重周宗。休要碧油紅旆。趁黑頭時節。做三公。堂上雙親未老。穩看金紫重重。

滿江紅

呀鼓聲中。又妝點、千紅萬綠。春試手、銀花影粲，雪梅香馥。歸夢不知家近遠，飛帆正掛天西北。記年時、歌舞綺羅叢，憑誰續。煙水迥，雲山簇。勞悵望，傷追琢。把蛛絲鵲喜意，占卜月正圓。時差獨照，夜偏長處，憐孤宿。悔從前、輕被利名牽，征塵撲。

又

萬竈貔貅，便直欲、掃清關洛。長淮路、夜亭警燧，曉營吹角。綠鬢將軍思下馬，黃頭奴子驚聞鶴。想中原、父老已心知，今非昨。狂鯢剪於菟，縛單于，命春冰薄。政人人自勇，翹關還槩，旗幟倚風飛。電影戈鋌射月，明霜鏑。且莫令榆柳塞門秋，悲搖落。

又

雲暗山昏，西風撼一天，悲雨隱君問短牆修竹。園何處，九月江南無雁到，素書封了誰傳與。待從頭、拚却把心寬，還如故。吳姬唱，燕姬舞。持玉罌，溫瓊醕。恨人生歡會，一年幾許。莫上小樓高處望，樓前詰曲來時路。便直須、疋馬兩蒼頭，東歸去。

醉江月

春愁幾許，似春雲藹藹，連空無數。□□眉尖偏易得，沒箇因由分付。楊柳煙濃，海棠花暗，綠漲橋頭路。小樓應是，有人和淚凝竚。長記寶軸妝成，鴛鴦繡幃，輕笑歌金縷。香雪精神依舊否。

風月誰憐虛度。帶減衣寬。十分憔悴。兩下平分。取黃昏可更。子規聲碎煙塢。

又

東籬成趣。有西風解事。催開叢菊。碎摺黃金。誰試手。一一清香堪掬。露溼涼輕。霞凝寒重。秀發如新沐。宮妝勻就。豈知紅紫麤俗。因念昔日淵明。微官不受。歸伴花幽獨。彈壓秋光三徑裏。濁酒牀頭初熟。飲劇腸寬。醉深吻燥。更把綸巾漉。此翁無恙。喚渠同醉船玉。

水調歌頭（爲施少儀作）

此日足可惜。心事正崔嵬。江淮踏徧。經歲相識。定誰來。每向酒邊長嘆。更向花邊長笑。意慮叵能猜。邂逅忽相遇。有客在塵埃。脫儒冠。著武弁。太多才。筆墨爭似鉤戟。容易到雲臺。餘子何須轉手。便把平生胸臆。勇去莫徘徊。事業上金石。人世自懽哀。

又（次下洞流杯亭作）

金篆鑲巖穴。玉斧鑿山湫。飛泉濺沫無數。六月自生秋。天矯長松千歲。上有冷然天籟。清響眇難收。亭屋創新觀。客鞅棹還留。推名利。付飄瓦。寄虛舟。烝羔釀秫。醅甕戢戢。蟻花浮。喚取能歌能舞。乘興攜將高處。杯酌薦崑球。徑醉雙□□。白眼視庸流。

六州歌頭（岳總幹藥括上吳荊州啓以此腔歌之因次韻）

百年忠憤。無淚洒江濱。曹劉事。埋露草。鑲煙榛。哭英魂。此恨有誰知者。時把劍。頻看鏡。徒自苦。

拳破裂。眼眇昏。從古時哉去速。那人子反袂傷麟。望家山何在。袞袞已罄纓。欲剗還生。猛堪驚。
膏肓危病。寧有藥。鍼七具。獻無門。荊州啓。條舊畫。漢將軍。不已存。便合囊封去。倉庾地。尙閒關。此不用心。漫有恐無干。人世權哀數耳。天或者又假人言。又一番春盡。高柳暗如雲。夢斷重關。

又次岳總幹韻

將軍何日去。築受降城。三萬騎。貔貅虎。戮鯢鯨。洗滄溟。試上金山望。中原路。平於掌。百年事。心未語。淚先傾。若若纍纍印綬。偏安久。大義誰明。倚危闌。欲徧江水亦吞聲。目斷蘋汀。海門清。停杯與問焉。用此手。雖積如京。波神怒。風浩浩。勃然興。捲龍腥。似把渠忠憤。伸懇請。翠華巡。呼壯士。挽河漢。蕩擄搶。長算直須先定。如細故。休苦綦綦。正清愁滿抱。鷗鷺却多情。飛過郵亭。

永遇樂（章史君席上）

別院春深。華堂晝永。嘉譙初啓。翠玉尊罍。紅牙絲管。睡鴨沈煙裏。弄晴雲態。行空絮影。漠漠似飛如墜。最多情。紫絲圍就。錯落亂星流地。史君自有元龍豪氣。喚客且休辭醉。蝶困蜂酣。燕嬌鶯姘。懽意濃如此。侃其笑語。止乎禮義。衣佩細紉。蘭芷遙歸去。殘更欲盡。曉鴉又起。

傳言玉女（次岳總幹韻）

日薄風柔。池面欲平。還皺紋楸玉子。磔磔敲春晝。衾繡半捲。花氣濃熏香獸。小園初試。轆轤銀

整。夢斷陽臺。甚情懷似病酒。鳳奩羞對。比年時更瘦。雙燕乍歸。寄與綠牋紅豆。那堪又是。牡丹時候。

清平樂

西園啼鳥。留得春多少。客裏情懷無日好。愁損連天芳草。博山灰冷香殘。微風吹滿銀箋。卓午花陰不動。一雙蝴蝶團圓。

又(東邪宰)

曉窗晴日。一點黃金橘。萬事如毛隨日出。多少人間頭白。未春長恨春遲。春來生怕春歸。辨取翔天簫鼓。莫教孤負茶蘼。

又(爲繆推官壽。清容繆之亭名也)

煙融雨膩。春去三之二了。却蘭亭脩禊事。判與仙翁一醉。方壺日月偏長。清容花草吹香。辦取此身強健。功名飽看諸郎。

又(壽林守)

欽頭蝴蝶。趁舞梅邊雪。酒瀉黃滕光奪月。歲歲年年蕉葉。邊城鶯喚春來。沙場馬到秋肥。脫却龍韜虎略。換渠金甲牙旗。

又

風韶煙膩春事三之二。說與人生行樂耳。富貴古來如此。西園已有心期。姚黃魏紫開時。纖指金荷漱灑。香脣銀竹參差。

又（江上重九）

西風獵獵。又是登高節。一片情懷無處說。秋滿江頭紅葉。誰憐鬢影淒涼。新來更點吳霜。孤負萸囊菊盞。年年客裏重陽。

眼兒媚

粉牆朱閣映垂楊。晴綠小池塘。東風颺暖。單衣初試。晝日偏長。鬢鬆兩鬢飛雲影。鈿合未梳妝。闌干側畔。閒拋荔子。驚散鴛鴦。

又

東風挾雨苦無端。惻惻送輕寒。那堪更向。湘灣六六。淺處留船。詩闌酒戲成孤負。春事已闌珊。離愁都在。落花枝上。杜宇聲邊。

又

莫嗔日日話思歸。歸也却便宜。東鄰招茗。西鄰喚酒。一笑開眉。人生萬事無緣足。待足是何時。妻能紡績。兒能耕穫。未必寒飢。

謁金門

風又雨。牆外落紅無數。人不歸來春不住。佳期還已誤。
青鸞飛得去。問天天亦許。細細一團愁緒。薄倖疏狂何處。化作

又

風雨後。枝上綠肥紅瘦。樂事參差團不就。一春如病酒。
樓外暖煙楊柳。憶得年時攜手。燕子雙雙來未久。頗知人意否。

又

愁萬疊。春在雨條煙葉。翠袖倚風寒霎霎。傍闌看乳鴨。
何處一聲啼鴉。架上茶蘼欲雪。繡被薰香香未歇。可憐音信絕。

又(壽何令)

冬十月。記取生申時節。梅傍小春融絳雪。淺寒猶未却。
且醉笙歌蕉葉。富貴不須頻說。國太夫人頭半白。看君金印燁。

又(秋晚口蕙花爲賦)

秋向晚。秋晚蕙根猶暖。碧染羅裙湘水淺。羞紅微到臉。
空空繡簾圍徧。月薄霜明庭院。妝罷寶奩慵不掩。無風香自滿。

霜天曉角(梅花)

玉粲冰寒。月痕侵畫闌。客裏安愁無地。爲徙倚。到更殘。
問花花不言。嗅香香欲闌。消得个温
存處。山六曲。翠屏間。

又（儀真江上夜泊）

寒江夜宿。長嘯江之曲。水底魚龍驚動。風捲地。浪翻屋。
詩情吟未足。酒興斷還續。草草興亡
休問。功名淚。欲盈掬。

又（金山吞海亭）

長江千里。中有英雄淚。却笑英雄自苦。興亡事。類如此。
浪高風又起。歌悲聲未止。但願諸公
強健。吞海上。醉而已。

又（夜舟過峨眉山）

江涵落日。風轉飛帆急。問訊蛾眉好在。無一語。送行客。
閒情眠未得。倚窗消酒力。却怕魚龍
驚動。且莫要。夜吹笛。

夜行船（京口南園）

紅漉羅裙三月二。露桃開。柳綿又起。百尺遊絲。罨鶯留燕。判與南園一醉。
歷歷斜陽明野水。
倚危闌。暮雲千里。說似遊人。直須燒燭。早晚綠陰青子。

長相思（峨眉亭）

東梁山。西梁山。占斷長江相對閒。古今雙鬢斑。
天漫漫。水漫漫。人事如潮多往還。淺顰深恨
閒。

烏夜啼

雲容曉色相涵。征驂碎點遙山。山如豆。是淮南。
路漸遠。家漸遠。恨難堪。見窗花葉底。鬢髮

祝英臺近

試單衣。扶短策。沙路淨如洗。乍雨還晴。花柳自多麗。爭知話別南樓。片帆天際。便孤了同心連
理。鎮縈繫。謾有羅帶香囊。般紅鬪輕翠。一紙濃愁。無處倩雙鯉。可堪飛夢悠悠。春風無賴。時
吹過亂鶯聲裏。

鵲橋仙（次韻湖上）

黃花似鈿。芙蓉如面。秋事淒然向晚。風流從古記登高。又處處悲絲急管。有愁萬斛。有才八
斗。慷慨時驚俗眼。明年一笑復誰同。料天遠爭如人遠。

又（壽葛宰）

松梢擎雪。竹枝溽露。炯炯照人清韻。仙家譜系合長生。元不藉藥爐丹井。凌雲壯志。垂天健
翮。九萬扶搖路穩。發聞政最有公車。定飛下日邊音信。

又

一番雨過。江頭綠漲。催喚扁舟解去。重來言語是相寬。怎得似而今且住。陽關聲斷。同心未
結。簌簌淚珠無數。秋鴻春燕往還時。莫忘了錦牋分付。

又

薄情也見。多情也見。不似這番著相。如何容易買歸舟。報南浦桃花綠漲。隨君無計。留君無
計。贏得淚珠兩行。夕陽明處一回頭。有人在高樓凝望。

西江月（泛洞庭青草）

漠漠波浮雲影。遙遙天接山痕。一聲漁唱起蘋汀。名利綠渠喚醒。短棹擬攜西子。長吟時弔
湘靈。白鷗容我作同盟。占取兩湖清影。

又（垂絲海棠一名醉美人）

撚翠低垂嫩萼。勻紅倒簇繁英。穠纖消得比佳人。酒入香肌成暈。簾幕陰陰窗牖。闌干曲曲
池亭。枝頭不起夢春醒。莫遣流鶯喚醒。

憶秦娥

秋蕭索。梧桐落盡西風惡。西風惡。數聲新雁。數聲殘角。離愁不管人飄泊。年年孤負黃花約。
黃花約。幾重庭院。幾重簾幕。

定風波

碧樹涼颺。驚畫扇。窗戶齊開。秋意參差滿。先自離愁裁不斷。蛩蟹更作聲聲怨。山繞千重溪。百轉隔了溪山。夢也無由見。歸計憑誰占。近遠。銀缸昨夜花如糝。

好事近

鴻雁幾時來。目斷暮山凝碧。別後故園無恙。定芙蓉堪折。休文多病廢吟詩。有酒怕浮白。不
是孤他詩酒。更孤他風月。

小重山

梧竹因依山盡頭。瀟瀟疎雨後。幾分秋。輕涼無數入西樓。憑闌久。滿眼動離愁。飛鷺下汀洲。怕知鴻雁到。帶書否。詩闌酒戲一齊休。人如削。身在水邊洲。

醜奴兒

綠陰窗几明如拭。粉黛初勻。無限芳心。翻動牙籤却殢人。多嬌愛學秋來曲。微顫朱脣。別後銷魂。字底依稀記指痕。

又

綺窗撥斷琵琶索。一一相思。一一相思。無限柔情說似誰。銀鈎欲寫回文曲。淚滿烏絲。淚滿烏絲。薄倖知他知不知。

更漏子

秋點長。秋夢短。怕見黃昏庭院。風窸窣。雨蕭騷。倚窗魂欲銷。候蛛絲。占鵲起。依舊濃愁一紙。紅袖黝。翠鈿薦。淚痕猶未乾。

減字木蘭花

西風淅淅。滿眼芙蓉紅欲滴。無限相思。百疊青山百曲溪。憑誰說與。衣帶別來寬幾許。好片心腸。不道秋來早晚涼。

臨江仙

上巳清明都過了。客愁惟有。心知子規昨夜忽催歸。驛程那復記。魂夢已先飛。回首故園花與柳。枝葉葉相思。歸來拚得典春衣。綠陰幽遠處。不管盡情啼。

又

鳳翥鸞飛空燕子。寶香猶惹流蘇。舊歡淒斷數行書。終山方種玉。合浦忽還珠。午枕夢圓春寂寂。依然刻雪肌膚。覺來煙雨滿平蕪。客情殊索莫。肯喚一尊無。

又

寒食清明都過了。客中無計留春。東風吹雨更愁人。繫船芳草岸。始信是官身。悵望故園煙水闊。幾時匹馬駸駸。別腸何止似車輪。殢天天不管。轉作兩眉顰。

南鄉子

簾幕闕深沈。燈暗香銷夜正深。花落畫屏。簷鳴細雨岑岑。滴破相思萬里心。曉色未平分。翠被寒生。不自禁。待得夢成翻惡況。堪繫。飛雁新來也誤人。

鷓鴣天

細聽樓頭漏箭移。客牀寒枕不勝欵。淒涼夜角偏多恨。吹到梅花第幾枝。人間闊。雁參差。相思惟有夢相知。謝他窗外芭蕉雨。葉葉聲聲伴別離。

又（元旦呈王帥）

柳際梅邊臘雪乾。釵頭蝴蝶又成團。飄零萍梗江湖客。冷落笙簫燈火天。澆濁酒。惜流年。牙旗夜市幾時穿。太平樂事終須在。老去心情恐不然。

又

濟楚偏宜淡薄妝。冰涵清潤玉生香。祇因夢峽成雲雨。便擬吹簫誇鳳凰。新聞阻。舊思量。多情翻不似垂楊。年年纔到春三月。百計飛花入洞房。

菩薩蠻

池荷開徧蓮房老。秋聲已入梧桐表。葵扇與桃笙。尙宜相帶行。危亭三百尺。爽氣真堪挹。淪茗且盤旋。翩翩吾欲仙。

又

相思繞徧天涯路。相思不識行人處。多病怕逢春。那堪春正深。日高梳洗懶。鸞鏡香塵掩。雙鬢綠鬆鬆。一簾花信風。

又

惜山不厭山行遠。山中禽鳥頻驚見。小雨似憐春。霏霏容易晴。青裙田舍婦。饒餉前村去。溪水想平腰。喚船依斷橋。

浣溪沙

(舊刻誤入山花子二闕今分出)

綠鎖窗前雙鳳奮。調朱勻粉玉纖纖。妝成誰解盡情看。柳轉光風絲鼻娜。花明晴日錦爛斑。一春心事在眉尖。

又

日轉雕闌午漏分。井梧落盡小窗明。寶牀絲索懶關心。愁壓春山應脈脈。困凝秋水想沈沈。低頭時露一灣金。

又

墨綠衫兒窄窄裁。翠荷斜褱領雲堆。幾時踪跡下陽臺。歌罷櫻桃和露小。舞餘楊柳趁風回。喚人休訴十分杯。

又

著破春衫走路塵。子規啼斷不禁聞。功名似我却羞人。象板且須歌皓齒。馬蹏何苦惜黃金。尊前休負此生身。

山花子（送杜仲高）

綠綺空彈恨未平。不堪執手送行人。碧酒漫將珍重意。莫辭斟。我定憶君吟渭北。君須思我賦停雲。未信高山流水曲。斷知音。

又

流轉春光又一年。春愁盡日兩眉尖。草草幽歡能幾許。已天邊。會得音書生羽翼。免教魂夢役關山。簾捲落花千萬點。雨如煙。

卜算子（東趙僉）

憶自別郎時。數到郎歸日。及至郎歸郎又行。淚臉香紅溼。殘夢怕尋思。宵繡慵收拾。夏簟青。青白晝長。背倚闌干立。

醉蓬萊（壽史帥）

政槐雲濃翠。榴火殷紅。暑風涼細。紫府神仙。向人間游戲。瑞節珠幢。瓊纓寶珮。炯冰壺標致。經濟規模。登庸衣鉢。家傳如此。禮樂醇儒。詩書元帥。盡洗凡蹤。平吞餘子。敬簡堂深。且從容。一醉慶祉綿綿。功名袞袞。比衡山湘水。更把陽和。從頭付與。滿門桃李。

醉落魄

藕花初發。熏風庭院涼成霎。碧紗金縷籠香雪。記得年時心事憑闌說。如今陡頓音書絕。夜窗羞見團團月。錦囊塵暗黃金玦。留取多情歸趁好時節。

江城子（次洪如晦韻）

醉來玉樹倚風前。舉吟鞭。指青帘。烏帽低昂。搖兀似乘船。傍路誰家妝束巧。斜映日。半窺簾。尋歡端合趁芳年。對鸚絃。且陶然。紙上從渠。劉馭與羸顛。漠漠綠陰春復夏。多少事。總懸天。

訴衷情（宿琴圻江上）

子規聲老又殘春。猶作未歸人。天意不能憐客。何事苦教貧。歸去也。莫逡巡。好從今。秧田車水。麥隴腰鎌。總是關心。

朝中措

駁雲行雨苦無多。晴也快如梭。春思正難拘束。客愁誰爲銷磨。尋花覓諶。傳杯託意。種種蹉跎。消息不來雲錦。淚痕溼滿香羅。

又

逢逢船鼓綠楊津。彼此是行人。先自離愁無數。那堪病酒傷春。岸花橋燕。低飛款語。滿面殷勤。後會不知何日。因風時惠嘉音。

柳梢青

征路迢迢。征旗獵獵。征袖徘徊。撲殺淚珠。怕聞別語。慵舉離杯。春風花柳齊開。只喚做愁端恨媒。一片衷腸。十分好事。等待回來。

滿庭芳 (次仁和韻時欲之官永興)

二十年間。舊遊踪跡。夢飛岳麓湘灣。征衫再理。秋老菊花天。爲客問君何好。愛水光山色爭妍。經行處。旗亭酹酒。曾記犀東偏。噫。其吾甚矣。不慚蹇拙。欲鬪嬋娟。辦輕輿短艇。強載衰顏。人道彬陽無雁。奈情鍾藕斷絲聯。須相憶。新詩賦就。時復寄吳牋。

竹齋詩餘終

竹齋詩餘跋

草堂詩餘若干卷。向來豔驚人目。每祕一冊。便稱詞林大觀。不知抹倒幾許騷人。卽如次仲幾叔輩。不乏寵柳嬌花。燕旂鶯耽等語。何愧大晟上座耶。草堂集竟不載一篇。真堪歎息。余隨得本之先後。次第付梨。凡經商緯羽之士。幸兼擷焉。秋分日。湖南毛晉識。